



MARISOL RAMIREZ / ARGAZKI PRESS

IBILALDIARI HASIERA. Antton Azkargorta, Anjeles Iztueta eta Juan Jose Ibarretxe, besteak beste, Ibilaldiaren lehen metroak egiten.



MARISOL RAMIREZ / ARGAZKI PRESS

IBILTZO. Ibilaldiko maskotak, Ibiltzok, txipiroi, arrain eta itsas-izarren laguntzaz, jarri zion kolorea *Lotu barik* kantari.



MONIKA DEL VALLE / ARGAZKI PRESS

Getxoko uholdea

IBILALDIA. Eguraldiaren mehatxuari muzin eginenez, 125.000 lagun bildu ziren igandean Getxon, ikastolen aldeko hitzorduari hutsik egin gabe. Jendetzak eta euriak uholdea eragin zuten Getxon

Aitziber Laskibar | GETXO

Ibilaldiaren antolatzaileek eginiko aurreikuspenak bete egin ziren igandean Getxon, eta, beraz, pozik agertu ziren San Nikolas ikastolako arduradunak. 125.000 lagun espero zituztela esan, eta, kopuru horixe bildu zen jaialdiaren kokagune izan zen zazpi kilometro eta erdiko ibilbidean zehar, antolatzaileek emandako kopuruaren arabera.

Igandea izanik ere, goizean goizetik abiatu ziren lagun asko Getxora, Ibilaldiaz ahalik eta ordurik gehienez gozatu nahian. Ikusi besterik ez da, ibilbidea 10:00ak arte zabaltzen ez bazen ere, goizeko 09:00etan Bilbotik abiatu zen metroa bete egin zela. Zer esanik ez, 10:00etatik aurrera Algortarantz abiatutako trenen kasua. Hori bai, metroak zerbitzua bost minutu oro jartzeak asko lagundu zuen jendearen etorrera etengabe.

09:30 pasatxo zirenean eman zitzaion hasiera protokolo ekitaldiari, Juan Jose Ibarretxe Eusko Jaurlaritzako lehendakaria buru zela, eta Santa Ana plaza jendez gainezka egonik. Txalapartariak hasiera deia egin ondoren, ohorezko aureskuak eman zien ongietorria instituzioei. Antton Azkargorta, Ibilaldiaren antolatzaile zen San Nikolas ikastolako lehendakariak, Iñaki Zarraoa Getxoko alkateak eta Anjeles Iztueta Eusko Jaurlaritzako Hezkuntza sailburuak euskara erabiltzearen garrantzia azpimarratu, eta gure hiz-

OMENALDIA

Antzerkigintzak eginiko lanagatik esker ona

«Franco garaian euskara debekatuta zegoen, eta idazleak atzerriratuak. Horri aurre egiteko, antzerkia euskaldunen bilgune bihurtu zen, eta gure hizkuntza landu eta aberasteaz gain, gizarte gaiak lantzeko ere balio izan zuen». Hala gogoratzen ditu Daniel Landartek «garai gogor haiek». Eskoletan euskaraz ikastea debekatuta egonik, «antzerki taldean ikasi zuten euskaraz irakurtzen heldu askok», oroitzen du.

60ko hamarkadatik antzerkigintzan eginiko lanagatik, Landartek berak, Agustin Zubikarai, Jean Louis Davantek, Pier Pol Berzaitzek, Battitta Urrutik eta Junes Casenavek omena jaso zuten. Bai eta Xirrizti Mirrizti, Txo-txongilo, Taupada, Antxieta, Goaz, Intxixu, Txo, Maskarada, Kukubiltxo eta Ekekei antzerki taldeek ere.

DATORREN URTEA

2003ko Ibilaldia Lekeition ospatuko da; Ondarroako Zubizahar eta Lekeitioko Azkue ikastola arduratuko dira antolaketa lanez



MONIKA DEL VALLE / ARGAZKI PRESS

KOSTALDEAREN XARMA. Eguraldia lagun izan ez bazen ere, ikastolekiko konpromisoak eta kostaldearen xarmak milaka

kuntza erabiltzearen aldeko apustua egin zuten.

Ildo berean mintzatu zen Ibarretxe ere. *Lotu barik* leloarekin bat eginik, eguneroko lanaren alde mintzatu zen, euskaraz azken urteetan aurrerapauso nabarmenak lortu dituen arren, «oraindik, asko dago-eta egiteko». «Euskara mundiala da; ikas dezagun, maita dezagun, eta, batez ere, hitz egin dezagun», esanaz amaitu zuen bere hizketaldia.

Une txarra ere igaro behar izan zuen Ibarretxek ekitaldia amaitu aurretik, Euskal Herrian

Euskaraz (EHE) taldeko zenbait lagunek *PNVren hizkuntza politika, iruzurra* eta *PNV ofizialtasunaren ukatzailea noiz arte?* zioten txartelak erakutsi baitzituzten haren alboan.

Hasiera ekitaldian, bestalde, hainbat aurpegi ezagun ikusi ahal izan ziren; hala nola, Bata-suneko Angel Mari Elkano eta Josu Urrutikoetxea, Jaurlaritzako Ingurumen sailburu Sabin Intxaurreaga edota EAJko EBBko Josune Ariztondo.

San Nikolas ikastolako bi aitzindarik zinta moztu ondoren, egun osorako zabaldu zen Ibi-

laldia. Hortik aurrerakoa, jende andana etengabeen etorreran, euritakoak zabaldu eta ixtean eta eguraldi txarraren aurrean umore ona erakustean laburbildu daiteke.

Lekeitio eta Ondarroako ikastolek hartu dute lekukoa

Ibilaldia kostaldeko herri batean egiteak dakarren edertasuna euriak goibeldu eta hondartzek eskaintzen dituzten aukerez nahi bezala gozatzeko aukera apalduta geratu bazen ere, datorren urteko Ibilaldiak egingo du beste saiaketa bat.